



**ATASSUT**

**UPA14/68-1**

**Gerhardt Petersen**

**30.04.2014**

**Aatsitassarsiortoqarnissaanut aammalu suliffissuarujussualiortoqarnissaanut siunissami periarfissaalersinnaasut tunngavigalugit nunatsinnut tikisillugit suliarortitassatut pisariaqartinneqarumaartussat pillugit ersarissaassutaasumik nalilersuinernullu atorneqarsinnaasumik Inatsisartut 2014-mi ukiakkut ataatsimiinneranni saqqummiunneqartussamik Naalakkersuisut nassuiaasiornissaannik aalajangiiffigisassatut siunnersuut. Nassuiaammi ilaatinneqassapput isumaginninnikkut, kulturikkit aammalu ulluinnarni inuunermi kingunerusinnaasutut naatsorsuutigineqartut. Naalakkersuisut qinnuigineqarput nassuiaat naggaserneqassasoq sulisussanik pisariaqartitsinerup ersarissarneqarneranik tassungalu atatillugu kalaallit piginnaasaannut, sulilernissaminnut piareersimassusaannut aammalu nuttarsinnaanermut piareersimassusaannut tunngassuteqartut ersarissitinneqarnerannik.**

(Inatsisartunut ilaasortat Knud Kristiansen aamma Gerhardt Petersen)

Soorlu ATASSUT-mit siunnersuutitsinnik saqqummiussisup erseqqissareeraa:

ATASSUT-mit assut pingaartipparput Kalaallit Nunaannut suliffissarsiortut killilersimaarnissaat pillugu Inatsisartut inatsisaat (nr. 27, 30. oktober 1992-meersoq) tunngavigalugu sulisinnaasut Kalaallit Nunaanniittut suliffissanut maaniittunut siulliusussaatitanerisa qularnaarneqarnissaa inatsisitigunnaangitsoq aammali inatsisip atortinneqarneratigut isumannaarneqartariaqartoq.

Avataaniit nunatsinnut suliarortut immikkoortunut arlalinnut immikkoortinneqarsinnaapput:

- 1) Qaffasissumik ilinniarsimasut nunatsinni nammineq piginngisagut
- 2) Nunatsinni sulisinnaasut naammassisinnaangisaannik immikkut suliaqarsinnaasut
- 3) Piffissap killilikkap iluani immikkut suliaqartussatut tikisitat
- 4) Sulisitsisut nunaqavissunik sulisussarsiortaraluarlutik pissarsisinnaanginnermikkut tikisitaat



- 5) Nunani allamiut namminneq “pilluarneq aningaasarsiornissarlu ujarlugit” suliffissarsiorlutik tikittartut
- 6) Kalaallit Nunaanni nunaqavissumik aappaqalersimanertik pissutigalugu tikittartut tikereernermillu kingorna suliaartortartut

Allat aamma taaneqarsinnaagaluarput, kisiannili taakku tamaasa ataatsimut katissagutsigit nunatta avataaneersut pingaartumik ukiuni kingulliunerusuni amerliartorput, ATASSUT-millu isumaqarluinnarpugut nunarput qiveqqaannartutut piumallerlunilu tikiffigeriaannartutut inissisimassanngitsoq.

Soorunami nunani allamiut tikilluaqqussavagut, kisiannili salliuttariaqarparput nunatsinni nunaqavissut suliffissatigut nunatsinnilu pinsinnaatitaaffitsigut allatigut illersorneqarnissaat, tamannalu pitsaanerpaamik pissappat nakkutigisinnaasariaqarpavut allaallu aamma pisariaqarfiatigut killilersimaarsinnaasariaqarpavut avataaniit tikittartut suliffissanillu immaq nunaqavissut kivissinnaasaraluinik “tigoqqaasartut”.

Killiffitsinnik qaffasissumik pitsaassusilimmik nalilersuisinnaassagutta aamma paasisutissat pitsaasut nutaanerpaallu pigalugit nalilersuillutalu nunani allamiut pillugit naalakkersuinikkut siunnerfinnik tikkuussisinnaasariaqarluta.

Tamanna qulakkeerniarlugu nassuiaammik pissutsinik ersersitsisumik Naalakkersuisut Inatsisartunut saqqummiussissasut siunnersuutigaarput, ATASSUT-millu iluarisimaarparput nassuiaammik taamaattumik pisariaqartitsisoqarnera paasilluarlugu siunnersuuterput ilalermassuk, neriuppugut aamma partiit allat tamanna peqataaffigerusulluarumaaraat.

Siunnersuutitsinnik saqqummiussisutta tunngavilersuuterput erseqqissumik saqqummiutereermagu ATASSUT-mit inassutigissavarput siunnersuut akuersaarneqassasoq.